

Nunatsinni sygeforsikring atuutilissagaluarp at suut pitsaaqutaassanersut suullu ajoqutaassanersut pillugit apeqquteqaat aallaavigalugu oqallisissiaq.

(Inatsisartunut ilaasortaq Siverth K. Heilmann, Atassut)

Akissuteqaat

(Peqqissutsimut, Isumaginninnermut Inatsisinillu Atuutitsinnermut Naalakkersuisoq)

Siullermeerneqarnera

Inatsisartunut ilaasoq Siverth K. Heilmann, Atassummeersoq, nunatsinni napparsimanermut sillimmasiineq atuutilissagaluarp at suut pitsaaqutaassanersut suullu ajoqutaassanersut pillugit apeqquteqaat aallaavigalugu oqallisissiaqartoq Naalakkersuisut qutsavigaat.

Innuttaasut peqqinnissaqarfimmit qanoq sullinneqarnissaminik naatsorsuuteqarsinnaaner at Atassutip oqallisissutigerusummassuk Naalakkersuisut iluarisimaarpaat. Pingaaruteqarporli naqissusissallugu Naalakkersuisut suli sulissutigissammasuk innuttaasut tamarmik assigiim-mik peqqinnissaqarfiup neqeroorutaannik naligiimmik atuisinnaatitaanissaat. Peqqinnissaqar-fiup neqeroorutaannik naligiimmik atuisinnaaneq ullumikkut arlalinnik tunngaveqarluni unamminartoqareerpoq, kisianni peqqinnerup iluani naligiinngittoqarnera annertusinnginnias-sammat suliap tamatuma ingerlateqqinnissaa pingaaruteqarpoq.

Napparsimanermut peqqinnissakkullu sillimmasiinnermut tunngatillugu oqaatigineqarsinnaa-voq assigiinngitsunik arlalinnik sillimmateqarmat. Ilaatigut sulisitsisup akiligaanik peqqinnissakkut sillimmasiisoqartarpoq soorluttaaq innuttaasoq nammineq peqqinnissakkut sillimmasiisinnaasoq. Nammineq imaluunniit sulisitsisup akiligaanik sillimmasiineq pisortat neqeroorutaanut tapiliussatut isigineqarsinnaavoq, suliaritinnerlu Kalaallit Nunaata avataani napparsimmavinni namminersortuni assigiinngitsutigut pisarpoq. Siunertaasarpoq utaqqisaria-qannginneq; napparsimasup Kalaallit Nunaanni Peqqinnissaqarfimmiit neqeroorutaanngit-sumik misissorneqarusunnera katsorsartikkusunneraluunniit, imaluunniit napparsimasup allami misissortikkusunnera suliaritikkusunneraluunniit. Sillimmasiineq sulisitsisumit akilerneqartoq ullumikkut pisortat suliffeqarfiutaani namminersortunilu atugaareerpoq. Sillimmasiinnermi sulisitsisumit akilerneqartumi Kalaallit Nunaata avataani napparsimmavinnut namminersorluni ingerlatsivinnut angalaneq aamma najugaqarneq nalinginnaasumik sulisup nammineq akilertarpa.

Napparsimanermut imaluunniit peqqinnissakkut sillimmasiineq, sulisitsisup sillimmasiine-ranut assingusoq, pisorta qarfinni neqeroorutissatut tulluannigilaq. Tamatuma saniatigut pisortat aqqissugaannik sillimmasiinnermik peqassappat pisortani utaqqinerit avaqqussinnaa-jumallugit namminersortunik napparsimmaveqarfinnik peqartariaqassaaq. Maani nunatsinni namminersortunik napparsimmaveqanngilagut, taamaattumik innuttaasut nunamut allamut misissortikkiartorlutik aamma suliaritikkiartorlutik aallartariaqartassapput. Tamatuma qaava-

tigut angalanermut aamma ineqarnermut aningaasartuutit ilanngunneqassapput, taamaasilluni sillimmasiinermit akit annertuumik qaffassallutik.

Danmarkimi nunanilu allani akileraarutitigut pisortanit akilerneqartunik assigiinngitsunik tapiissuteqartarnermut aaqqissuussaqarput, tassani innuttaasup kigutilerisumut, tarnip pissusaanik ilisimasalimmit ikiorserneqarnermut, tagiartuisarnermut, isarussanut aamma iisartakannut aningaasartuutaanut tapiisoqartarluni. Taassuma saniatigut nammineq napparsimanermut sillimmateqartoqarpoq, assersuutigalugu "Sygeforsikring danmark", tassani ilaasortanut suli annerusumik tapiinissamik neqerooruteqartoqarpoq. Nunatsinni neqeroorutit taakkua nammineq akiliinertaqanngillat. Paarlattuanik, assersuutigalugu Danmarkimi, atuisoq akiliuteqartarpoq soorlu kigutileriffimmut aamma nakorsaatinut.

Nunanit allanit misilittakkat aamma takutippaat nammineq peqqinnissakkut sillimmasiinermit aamma atuisup nammineq akiliuteqartarneranik siaruarterineq misissortinnissamut nakorsartinnissamullu periarfissaqarnermik equngasoaqalersitsisartoq.

Siunnersuuteqartup aamma eqqaavaa nappaatit ilaannut nakorsartinnernut imaluunniit nakorsaatinut atuisut akiliisalernissaannik atuutitsilerneq periarfissaasoq. Peqqinnissaqarfimmi sullissinernut immaqalu nappaammut aalajangersimasumut nakorsat naliliinerannut atuisut akiliisarnerat peqqinnissaqarfimmi annikigisassaannngitsumik annertuumik allaffissornermik kinguneqassasoq naatsorsuutigineqarsinnaavoq. Naatsorsuutigineqartariaqarportaaq atuisut akiliisarnerannik atuutitsilerneq innuttaasut ilaasa nakorsiannngitsoortalernerannik, naak immaqa tamanna pisariaqartikkaluarlugu, kinguneqarsinnaasoq.

Naalackersuisut taamatut oqaaseqarlutik pitsaasumik kinguneqarluartussamillu oqallinnissamut qilanaarput.